

**Protokolo de la 59-a senatkunsido** (la 53-a post la oficialigo de AIS fare de la Konsilio de la XII, la 62-a post la fakta eklaboro) okazinta en la universitata domo en strato Costache Negri 7 en Sibio (RO) dum rumana scienca sesio. Kunsidtempoj kaj ĉeestantoj:

- Vendredo, 2007-03-02, 21:30–23:30; senatanoj Fössmeier, Minnaja, Quednau; gasto ADoc. Lo Jacomo. Tagorderoj 1–5.
- Sabato, 2007-03-03, 16:25–18:30; senatanoj Fössmeier, Minnaja, Quednau, Wickström; gastoj d-ro Gebhardt, OProf. Lobin, ADoc. Lo Jacomo, ADoc. Macko, ADoc. Tanc. Tagordero 6.
- Dimanĉo, 2007-03-05, 16:40–19:30; senatanoj Fössmeier, Minnaja, Quednau, Wickström; gastoj OProf. Lobin, ADoc. Lo Jacomo. Tagorderoj 7–10.

1. *Formalaĵoj*. Dum ĉiuj kunsidoj ĉeestas almenaŭ tri senatanoj, do la Senato estas kvoruma. Pro la malsano de prezidanto OProf. Frank la kunsidon gvidas vicprezidanto OProf. Minnaja. Protokolos OProf. Fössmeier kiel direktoro de la protokolfico.
2. *Omaĝo al prezidanto Helmar Frank*. La senato dediĉas al la prezidanto ekzempleron de la sesia volumo de la rumana scienca sesio. La dediĉon subskribas ĉiuj senatanoj; krome ĉiuj partoprenantoj de la sesio estu invitataj subskribi.
3. *SUS 30*. Vicprezidanto Minnaja raportas pri reprenitaj kontaktoj kun la Hon. Sen. Fausta Morganti cele al reaktiviĝo en San Marino, kaj estas komisiita plu flegi ilin per planita persona renkonto. SUS 30 okazu en San Giuliano Mare, kvartalo de Rimini, kiel jam decidite de la 2-a ĝis la 8-a de septembro 2007. Unu tago, verŝajne la fina sabato, okazu en San-Marino. En via Briolini en San Giuliano disponeblas du ĉambroj por po 30 personoj; vicprezidanto Minnaja esploras ilian taŭgecon. Eblus uzi ankaŭ ejojn de la mezlernejo Dante Alighieri.  
La senato konstatas, ke la fakta rolo de la ekzamen-kotiza rabato de nun 75 % ne plu estas tiu laŭ la apendico al la kotizregularo (AK). Tial ĝi unuanime decidas, ke la rabato estonte dependu nur de la loĝloko de la kandidato kaj validu por ĉiuj SUS-lokoj. Ĉar la sekva ĝenerala asembleo okazos nur dum SUS 30, tiu ĉi decido validas pro urĝeco almenaŭ por SUS 30, eĉ se la asembleo ĝin malkonfirmos.
4. *Acta Sanmarinensia*. La senato rekomendas al la Subtena Sektoro plu subteni la eldonadon de la revuo Acta Sanmarinensia. Por ĝi estis trovita nova redaktoro, Pierluigi Cinquantini.
5. *Rilatoj al IAU*. Vicprezidanto Minnaja sendos al IAU (Internacia Asocio de Universitatoj) dosieron pri la agado de AIS, pretigitan interkonsente kun la Informofico. ADoc. Lo Jacomo, kiu jam ĉeestis la renkontiĝon de OProf. Wandel kun la Sekretariino de IAU en Parizo, rekomendas aldoni al tiaj dosieroj la posthistorion de diplomitoj por montri, kiel ili utiligas siajn diplomojn; krome li estas komisiita eventuale surloke kontakti al IAU kaj, se necese, doni pliajn sciigojn.
6. *Kunlaboro kun Fondaĵo Bavaria-Romana*. D-ro Walter Gebhardt, direktoro de Fondaĵo Bavaria-Romana por Sociala Helpo, proponas al AIS komunan starigon de universitataj studoj pri pedagogiaj fakoj. Laŭ unuanima decido la senato kaj la fondaĵo subskribas tiucelan intenc-deklaron. Po du komisiitoj de la du flankoj ellaboru kontrakton pri la afero.
7. *Procesoj*. La procesoj kun impostoficejo Paderborn kaj kun prof. Piotrowski daŭras, ne atendeblas baldaŭa decido de la tribunaloj.
8. *Filioj kaj partneroj*. Internacia Universitato Karlovo aligis 14 studentojn al AIS. Akademio LEUKAIS ne povis eklabori pro la nekonsento de la slovakaj aŭtoritatoj. ISTK en Bydgoszcz ĉi-jare jam aligis 15 kaj anoncis pliajn 29 studentojn. Kun la ŝtata universitato Bydgoszcz kaj kun WSINSP (Wyższa Szkoła Informatyki i Nauk Społeczno-Prawnych w Bydgoszczy) estis subskribitaj intencdeklaroj pri kunlaboro. La senato aprobas la realigon de tiuj deklaroj, dankas al prof. Sudoł kaj Lewanderska-Quednau pro ilia laboro kaj petas ilin evoluigi la deklarojn al kontraktoj.

AIS kun kontento observas reaktiviĝon de sia suprasilezia branĉo, kiu faris provizoran interkonsenton pri kunlaboro kun FAM (Fundacja Akademia Mediów) en Cieszyn (PL) kaj IUK en Karlovo (BG).

9. *Regularoj*. La statuto de A.I.S., la kadra asocio registrita en San-Marino, estu tradukita en ILon. La studadregularo estu resume tradukita en la italan por faciligi al la anoj de A.I.S. ĝian prijuĝon.

10. *Sekva kunsido*. La sekva kunsido de la senato okazu je la inaŭgura tago de SUS 30, 2007-09-02, en San Giuliano. Detaloj estos anoncitaj en la programo de SUS 30.

Sibio, 2007-03-04

C. Minnaja, kunsidestro

R. Fössmeier, protokolanto